

Bosna i Hercegovina
FEDERACIJA BOSNE I HERCEGOVINE
ZENIČKO-DOBOJSKI KANTON
SKUPŠTINA

Broj: 01-01-5397-6/17
Zenica, 12.04.2017. godine

ZAPISNIK

o održanoj sjednici dva potvrđena kandidata za mjesto predsjedavajućeg i/ili zamjenike predsjedavajućeg Skupštine Zeničko-dobojskog kantona, radi novog dogovora o izboru novog predsjedavajućeg Skupštine

Sjednica je održana dana 12.04.2017. godine sa početkom u 15,38 sati, u sali 109/I zgrade Kantona, ul. Kučukovići br. 2 u Zenici, a na pismeni zahtjev dvojice zamjenika predsjedavajuće Skupštine Jasmina Duvnjaka i Ive Tadića, kao dva ranije potvrđena kandidata za mjesto predsjedavajućeg i/ili zamjenike predsjedavajućeg Skupštine Zeničko-dobojskog kantona.

Sjednici su prisustvovali: **Jasmin Duvnjak**-zamjenik predsjedavajuće Skupštine, **Ivo Tadić**- zamjenik predsjedavajuće Skupštine, **Ibrahim Avdagić**-sekretar Skupštine Zeničko-dobojskog kantona i **Sanela Ahmić**-namještenica Stručne službe Skupštine. Sjednici nije prisustvovala predsjedavajuća Skupštine Zeničko-dobojskog kantona **Draženka Subašić**, kao treći ranije potvrđeni kandidat za mjesto predsjedavajućeg i/ili zamjenike predsjedavajućeg Skupštine Zeničko-dobojskog kantona, (iako je bila pismeno obavještena o održavanju navedene sjednice, koja je povodom istog pismeno obavijestila imenovane da navedenoj sjednici neće prisustvovati pošto istu smatra nelegalnom).

Na početku sjednice, **Ivo Tadić**- zamjenik predsjedavajuće Skupštine je u uvodnom obraćanju rekao da su navedenu sjednicu zakazali on i drugi zamjenik predsjedavajuće Skupštine u razgovoru sa predsjedavajućom Skupštine ali da je predsjedavajuća nažalost uputila jedan dopis u kojem je potvrdila da neće prisustvovati navedenoj sjednici. Dalje je napomenuo da je poznat razlog sazivanja navedene sjednice, da su oni, (on i gospodin Jasmin Duvnjak), prije nekoliko dana uputili dopis predsjedavajućoj da razmisli da ona, kao predsjedavajuća, iz reda srpskog naroda, pošto nije dio parlamentarne većine, preuzme ulogu dopredsjedavajuće, a da gospodin Duvnjak, kao jedan od njih dvojice, preuzme mjesto predsjedavajućeg ali da se predsjedavajuća u svom dopisu očitovala da navedena procedura nije u skladu sa važećim zakonima, te da on smatra suprotno, da su njih troje kandidovani od strane Skupštine i da se između sebe dogovaraju ko će biti predsjedavajući, te da misli da je to ključno, a da ona izbjegava prisustvovanje navedenom sastanku. Na kraju je istakao da bi volio čuti i gospodina Duvnjaka i da vide što im je činiti.

Zatim je **Jasmin Duvnjak**-zamjenik predsjedavajuće Skupštine, rekao da su se oni, (kao što je gospodin Tadić kazao), na osnovu političkog dogovora stranaka koalicije SDA, SBB i HDZ, u Zeničko-dobojskom kantonu, dogovorili da se ide u promjenu rukovodstva Skupštine Zeničko-dobojskog kantona, te da je prije petnaestak ili dvadeset dana takva obavijest došla u Skupštinu Zeničko-dobojskog kantona i da je predsjedavajuća Skupštine o tome obavještena i da je nakon toga od strane njega i drugog zamjenika predsjedavajuće, gospodina Tadića, poslat dopis kojim su oni povukli svoju saglasnost koju su ranije dali na sjednici koja je bila 24.12.2014. godine, a gdje su oni, shodno Ustavu i shodno Poslovniku, kao izabrani predstavnici bošnjačkog, hrvatskog i srpskog naroda odlučili između sebe ko je predsjedavajući, a ko su zamjenici, a što je bilo u skladu sa parlamentarnom većinom koju su tada činili SDA, DF i HDZ. Potom je napomenuo da 18 mjeseci otkako DF više nije dio te parlamentarne većine, otkako je u istu ušao SBB, na čelu Skupštine se nalazi predstavnik opozicije što je prilično nesvakidašnje za parlamentarna tijela i za demokratske institucije u kojima je sasvim uobičajeno, sasvim legitimno, da se na čelu zakonodavnih tijela, (parlamenta, skupština, vijeća itd.), nalaze

predstavnicima parlamentarne većine koja podržava Vladu i koja je aktuelna. Istakao je da je nakon 18 mjeseci konačno donesena odluka političkih faktora u Zeničko-dobojskom kantonu i da su on i gospodin Tadić dobili obavijest i odluku od njihovih političkih organa i da su oni shodno tome povukli ranije datu saglasnost i zakazali navedeni radni sastanak o kojem su njih sve troje obavješteni, a na kojem će donijeti odluku o izboru novog predsjedavajućeg Skupštine Zeničko-dobojskog kantona. Naglasio je da je oko 25 minuta prije početka navedene sjednice dobio dopis predsjedavajuće Skupštine u kojem je ona navela da neće prisustvovati pomenutom sastanku iz određenih razloga, te da mu je žao što i ona nije prisutna na navedenom sastanku, da otvoreno razgovaraju i u jednoj pravoj demokratskoj atmosferi uz puno ljudsko uvažavanje održe radni sastanak, pogotovo što se radi o gospođi Subašić koja je postala predsjedavajuća isključivo podrškom i voljom njih dvojice i kolega iz rukovodstva Skupštine, na jednom istom takvom sastanku i da su očekivali da bude prisutna, te da je njemu jako zbog toga žao. Naglasio je da se tu radi o odlučivanju, a da se parlamentarna odlučivanja uvijek donose, ako to nije drugačije definirano, većinom glasova. Ponovio je da mu je žao što na sastanku nije prisutna i predsjedavajuća i da je u skladu sa demokratskom kulturom bilo poželjno da se i ona barem pojavila lično na tom sastanku, a ne da im je poslala pomenuti dopis.

Nakon toga, ponovo se obratio **Ivo Tadić** koji je rekao da smatra da oni kao rukovodstvo najvišeg zakonodavnog tijela ne smiju ni u jednom trenutku dovesti u pitanje funkcioniranje zakonodavne i izvršne vlasti, uz napomenu da je prije pomenutog sastanka bila održana sjednica Kolegija na kojoj nije utvrđen dnevni red, te da mu je takođe žao što nema gospođe Subašić.

Potom je **Jasmin Duvnjak** pitao sekretara Skupštine ima li potrebe da, uvažavajući dosadašnju vrlo korektnu saradnju i profesionalnu komunikaciju koju su on i gospodin Tadić imali dotada sa gospođom Subašić, naprave pauzu od 15 minuta kako bi se eventualno ona pozvala, zamolila da dođe ili da nema potrebe za to s obzirom na njen pomenuti dopis, povodom čega je **Ibrahim Avdagić**-sekretar Skupštine rekao da se predsjedavajuća u svom dopisu izjasnila da neće prisustvovati navedenoj sjednici, nakon čega je **Ivo Tadić** istakao da smatra da za tim nema potrebe s obzirom da su od nje dobili pisani odgovor i s obzirom da je prije početka sjednice bila u sali i napustila sjednicu, te rekla da istoj neće prisustvovati, te da ne vidi svrhe da se ponovo poziva. Dalje je istakao da je SDA najjača politička stranka sa najvećim brojem zastupnika i najvećim brojem ministara u izvršnoj vlasti i da s toga smatra odnosno da predlaže da se izjasne u vezi predsjedavajućeg, te predlaže da gospodin Duvnjak bude predsjedavajući Skupštine, a gospođa Subašić i on dopredsjedavajući Skupštine.

Zatim se **Jasmin Duvnjak** zahvalio Ivi Tadiću na iznesenom prijedogu i na njegovom povjerenju, u skladu sa utvrđenim dogovorom koalicije SDA, SBB, HDZ, poštujući volju demokratske većine, te poštujući njegov stav da predstavnik najjače političke partije bude na čelu rukovodstva Skupštine, on prihvata tu kandidaturu, uz dodatak da u slučaju da bude izabran za predsjedavajućeg Skupštine, obavezuje se da će raditi u skladu sa svim propisima i uvažavati sve političke faktore, sve političke partije u Skupštini Zeničko-dobojskog kantona, bez obzira da li one dolaze iz pozicije ili opozicije, te da će rad Skupštine u narednom periodu biti kvalitetan i funkcionalan.

Poslije toga, **Ivo Tadić** je dao njegov izneseni prijedlog na izjašnjavanje, te potom konstatovao da su njih obojica glasali "za" pomenuti prijedlog, čime je isti prihvaćen sa 2 glasa "za".

Zatim je **Ivo Tadić** upitao sekretara Skupštine da li on ima šta da doda, nakon čega je **Ibrahim Avdagić**-sekretar Skupštine rekao da pošto Stručna služba Skupštine pruža stručnu, pravnu i administrativno-tehničku pomoć poslanicima Skupštine, predsjedavajućem i zamjenicima, da je on dužan da u ime Stručne službe Skupštine da mišljenje koje treba da uđe u zapisnik, pošto navedeni čin može proizvesti neke postupke pred sudom, napominjući da on smatra da navedeni način promjene predsjedavajuće Skupštine nije u skladu sa Ustavom Federacije, Ustavom Kantona i Poslovníkom Skupštine i da smatra da mora biti saglasnost sva tri kandidata da bi se ta odluka donijela, tako da to želi naglasiti da oni to znaju prije potpisivanja Odluke, da poslije ne kažu da im to nije rekao, da im nije dao mišljenje, uz napomenu da on osjeća potrebu da im to kaže.

Nakon toga **Jasmin Duvnjak** i **Ivo Tadić** su donijeli i svojeručno potpisali Odluku o izmjeni Odluke o izboru predsjedavajućeg i zamjenika predsjedavajućeg Skupštine Zeničko-dobojskog kantona u kojoj se konstatuje promjena predsjedavajućeg Skupštine i jednog zamjenika predsjedavajućeg Skupštine, a koja stupa na snagu danom donošenja i koja će se objaviti u «Službenim novinama Zeničko-dobojskog kantona», imajući u vidu da je i ranija Odluka o izboru predsjedavajućeg i zamjenika predsjedavajućeg Skupštine Zeničko-dobojskog kantona takođe objavljena u «Službenim novinama Zeničko-dobojskog kantona»

Poslije toga **Ivo Tadić** je rekao da, koliko on zna, u Ustavu stoji da kandidati koje potvrdi Skupština odlučuju između sebe ko će biti predsjedavajući, te da to ne znači da to mora biti jednoglasno, a u vezi navedenog je **Jasmin Duvnjak** istakao da nigdje nije navedena kategorija konsenzusa, ni u Ustavu Federacije, ni Ustavu Kantona, kao ni u Poslovniku, da ne stoji termin da se dogovaraju” i da ne stoji termin “konsenzus, jer da stoji termin “konsenzus” to bi onda obligatno tražilo sve tri volje, te da on samo želi to prokomentarisati, da oni nisu uzurpirali kategoriju konsenzusa jer tog termina nema niti u jednog pravnoj normi, niti Ustava, niti Poslovnika, već da ima termin “odlučuju”, kao i da je logično ukoliko se ima procedura imenovanja, da tri potvrđena kandidata od Skupštine izabiraju između sebe, odlučuju, što ne znači da se dogovaraju konsenzusom nego da odlučuju, što je prilično imanentno, normalno za parlamentarno odlučivanje da se odlučuje većinom glasova, da to nekad bude jednoglasno, a da nekad to bude većinom glasova. Takođe je naglasio da se podrazumjeva da ako procedure razrješenja nisu precizirane, navedene, da ta razrješenja idu putem kojim su i imenovanja.

Ibrahim Avdagić-sekretar Skupštine je ponovo istakao da on ne želi da ga oni pogrešno razumiju već da samo želi da im ukaže na svoje pravno mišljenje, da kasnije ne bi mogli reći da sa istim nisu bili upoznati, napominjući da mu je poznata praksa Ustavnog suda i da im je samo u tom smislu htio skrenuti pažnju i ukazati na to, a da oni naravno imaju pravo na svoje mišljenje i da on isto poštuje, te da oni ne moraju uvažiti njegovo mišljenje, koje je samo njegov savjet koji im je on želio dati kao sekretar Skupštine, odnosno ukazati im na propis.

Sjednica je završena u 15,57 sati.

ZAPISNIK SAČINIO:

Ibrahim Avdagić
Ibrahim Avdagić



SEKRETAR SKUPŠTINE

Ibrahim Avdagić
Ibrahim Avdagić